

Na osnovu člana 106. stav (7) Zakona o visokom obrazovanju – prečišćeni tekst ("Službene novine Tuzlanskog kantona", broj: 21/21 i 5/22), ministar obrazovanja i nauke Tuzlanskog kantona, donosi

PRAVILNIK
o uslovima, kriterijima i postupku dodjele stipendija nadarenim redovnim studentima
javne visokoškolske ustanove

Član 1.

(Predmet)

Ovim pravilnikom bliže se uređuju uslovi, kriteriji i postupak dodjele stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona (u daljem tekstu: Univerzitet) prvog i integrisanog prvog i drugog ciklusa studija.

Član 2.

(Finansijska sredstva)

(1) Sredstva za dodjelu stipendija osiguravaju se u Budžetu Tuzlanskog kantona (u daljem tekstu: Budžet), na budžetskoj poziciji 24010018 – Ministarstvo obrazovanja i nauke, u okviru glavne grupe konta 614200 ODD207 (fun.kod 0941) - stipendiranje posebno nadarenih redovnih studenata javne visokoškolske ustanove.

(2) Dodjela stipendija, u tekućoj akademskoj godini, vrši se pod uslovom da su u Budžetu planirana i obezbjeđena sredstva za predmetnu namjenu.

(3) Stipendija može biti dodijeljena jednokratno ili u više mjesečnih rata, zavisno od planiranih i raspoloživih sredstava u Budžetu, što se bliže određuje ugovorom iz člana 12. ovog pravilnika.

Član 3.

(Visina stipendije)

(1) Visina stipendije, u pravilu, iznosi 1.500,00 (jednahiljadapetstotina) konvertibilnih maraka.

(2) Visina stipendije iz stava (1) ovog člana može se mijenjati, u zavisnosti od iznosa planiranih i obezbjeđenih sredstva u Budžetu, kao i broja prijavljenih kandidata koji ispunjavaju uslove i kriterije određene ovim pravilnikom.

Član 4.

(Uslovi za dodjelu stipendija)

(1) Uslovi koje kandidat za dodjelu stipendije mora ispunjavati su:

a) da je u statusu redovnog studenta prvog ili integrisanog prvog i drugog ciklusa studija Univerziteta,

b) da je u tekućoj akademskoj godini prvi puta upisao odnosnu godinu studija,

c) da je u prethodnoj godini studija ostvario prosjek ocjena minimalno 9,00,

d) da je položio sve ispite iz prethodnih godina studija.

(2) Izuzetno od uslova utvrđenog stavom (1) tačka c) ovog člana, kandidat za dodjelu stipendije u statusu studenta prve godine studija, pravo na dodjelu stipendije može ostvariti pod uslovom da je u prethodne četiri godine redovnog školovanja imao prosjek ocjena 5,00.

Član 5.

(Kriteriji za dodjelu stipendija)

(1) Kriteriji za dodjelu stipendija su:

a) visina prosjeka ocjena ostvarena u prethodnoj godini studija u odnosu na godinu studija koju je kandidat upisao u akademskoj godini u kojoj se stipendija dodjeljuje,

b) upisana godina studija,

c) visina prosjeka ocjena ostvarena u svim godinama studija koje prethode godini studija upisanoj u akademskoj godini u kojoj se stipendija dodjeljuje.

(2) Kriterij iz stava (1) tačka c) ovog člana primjenjuje se samo u slučaju ukoliko na rang listi dva ili više kandidata imaju isti broj bodova, u kom slučaju se prednost daje kandidatu koji je ostvario veći ukupan prosjek ocjena u svim godinama studija koje prethode godini studija upisanoj u akademskoj godini u kojoj se stipendija dodjeljuje.

(3) Ukoliko se prednost na rang listi ne može utvrditi po osnovu kriterija utvrđenih stavom (1) i (2) ovog člana, prednost se daje kandidatu čije domaćinstvo, po članu porodičnog domaćinstva, ostvaruje manji procenat prosječne neto plaće ostvarene u Federaciji Bosne i Hercegovine u prethodnoj godini prema podacima Zavoda za statistiku Federacije Bosne i Hercegovine, u kom slučaju će se od kandidata naknadno tražiti potrebna dokumentacija.

Član 6.

(Bodovanje po osnovu ostvarenog uspjeha)

Po osnovu ostvarenog uspjeha u prethodnoj godini studija, odnosno prethodne četiri godine redovnog školovanja za studente prve godine studija, kandidatu pripadaju bodovi kako slijedi:

a) prosjek ocjena 10,00.....	100 bodova
b) prosjek ocjena 9,9.....	95 bodova
c) prosjek ocjena 9,8.....	90 bodova
d) prosjek ocjena 9,7.....	85 bodova
e) prosjek ocjena 9,6.....	80 bodova
f) prosjek ocjena 9,5.....	75 bodova
g) prosjek ocjena 9,4.....	70 bodova
h) prosjek ocjena 9,3.....	65 bodova
i) prosjek ocjena 9,2.....	60 bodova
j) prosjek ocjena 9,1.....	55 bodova
k) prosjek ocjena 9,00.....	50 bodova
l) prosjek ocjena 5,00.....	50 bodova

Član 7.

(Bodovanje po osnovu upisane godine studija)

Po osnovu upisane godine studija kandidatu pripadaju bodovi kako slijedi:

a) student pete godine studija.....	5 bodova
b) student četvrte godine studija.....	4 bodova
c) student treće godine studija.....	3 bodova
d) student druge godine studija.....	2 bodova
e) student prve godine studija.....	1 bodova

Član 8.

(Postupak dodjele sredstava)

(1) Dodjela sredstava vrši se nakon provedenog konkursa za dodjelu stipendija nadarenim studentima (u daljem tekstu: konkurs), koji za svaku akademsku godinu za koju su obezbijeđena sredstva u Budžetu raspisuje Ministarstvo obrazovanja i nauke Tuzlanskog kantona (u daljem tekstu: Ministarstvo).

(2) Konkurs se objavljuje na internet stranici Vlade Tuzlanskog kantona (u daljem tekstu: Vlada) i Ministarstva, a uporedo sa objavljivanjem konkursa Ministarstvo o objavljenom konkursu, u pisanoj formi, obavještava Univerzitet, koji je tu obavijest obavezan postaviti na oglasnoj ploči Univerziteta.

(3) Prijava na konkurs, sa potrebnom dokumentacijom, podnosi se Ministarstvu, u roku od deset dana od dana objavljivanja konkursa na internet stranici Ministarstva.

(4) Tekst konkursa obavezno sadrži:

- pravni osnov za raspisivanje konkursa,
- rok za podnošenje prijave po konkursu,
- iznos stipendije koji se dodjeljuje,
- uslove i kriterije za dodjelu stipendije,
- spisak potrebne dokumentacije koja se prilaže uz prijavu,

f) druge elemente značajne za provođenje konkursa.

Član 9. (Dokumentacija)

(1) Uz prijavu na konkurs koja je sastavni dio ovog pravilnika (prilog I), kandidat dostavlja sljedeću dokumentaciju (u originalu ili ovjerenj kopiji):

a) uvjerenje da je na Univerzitetu, u akademskoj godini za koju se vrši dodjela stipendije, prvi puta upisao studijsku godinu, i da se nalazi u statusu redovnog studenta,

b) uvjerenje o ostvarenom prosjeku ocjena u prethodnoj godina studija u odnosu na godinu studija koju je kandidat upisao u akademskoj godini u kojoj se stipendija dodjeljuje, i ukupan prosjek ocjena u svim prethodnim godinama studija, izdato od strane Univerziteta na posebnom obrascu koji je sastavni dio ovog pravilnika (prilog II),

c) drugu dokumentaciju određenu tekstom konkursa.

(2) Prijave koje nisu sačinjene na obrascu iz stava (1) ovog člana, kao i potvrde koje nisu dostavljene na obrascu iz stava (1) tačka b) ovog člana neće se uzimati u razmatranje, što će posebno biti naznačeno u tekstu konkursa.

Član 10. (Komisija)

(1) Konkursnu proceduru provodi komisija koju čine najmanje tri člana predstavnika Ministarstva, koju imenuje ministar obrazovanja i nauke Tuzlanskog kantona (u daljem tekstu: ministar).

(2) Komisija radi na sjednicama i za svoj rad odgovara ministru.

(3) Članovi komisije ne mogu biti lica čiji članovi porodičnog domaćinstva učestvuju u postupku za dodjelu stipendije.

(4) Komisija je dužna razmotriti prijave u pogledu blagovremenosti i potpunosti, utvrditi broj bodova po svakom od osnova, ukupan broj bodova po kriterijima za dodjelu stipendije i najkasnije u roku od osam dana od dana zatvaranja konkursne procedure sačiniti prijedlog rang liste kandidata za dodjelu stipendija i listu kandidata čiji su zahtjevi nekompletni i neblagovremeni, i iste objaviti na internet stranici Vlade Tuzlanskog kantona i internet stranici Ministarstva.

(5) Prijedlog rang liste obavezno sadrži:

a) prezime, ime jednog roditelja, ime podnosioca zahtjeva,

b) broj bodova po svakom od utvrđenih kriterija,

c) ukupan broj bodova po svim kriterijima,

d) u slučaju utvrđivanja prednosti pri jednakom broju bodova podatke o kriterijima na osnovu kojih je utvrđena prednost i

e) pouku o pravnom lijeku sa tačno naznačenim rokom do kada se može izjaviti prigovor.

(6) Neblagovremene i nepotpune prijave komisija neće uzimati u razmatranje, a prijavljeni kandidati o razlozima ne postupanja po zaprimljenim prijavama obavještavaju se isticanjem posebne liste.

Član 11.

(Postupak po prigovoru i donošenje konačne rang liste)

(1) Nezadovoljni kandidati mogu podnijeti prigovor na prijedlog rang liste i liste u roku od tri dana od dana isticanja listi na internet stranici Ministarstva.

(2) O prigovorima iz stava (1) ovog člana odlučuje ministar u roku od tri dana od dana isticanja roka za podnošenje prigovora.

(3) Konačnu rang listu za dodjelu stipendija utvrđuje ministar.

Član 12. (Ugovor)

(1) Na osnovu konačne rang liste ministar sa kandidatom zaključuje ugovor kojim se uređuju međusobna prava i obaveze.

(2) Ugovor iz stava (1) ovog člana zaključuje se najkasnije u roku od sedam dana od dana isticanja konačne rang liste dobitnika stipendije na internet stranici Ministarstva.

(3) Kandidat koji u ostavljenom roku ne potpiše ugovor smatrat će se da je odustao od stipendije, izuzev ako kandidat iz opravdanih razloga nije u mogućnosti potpisati ugovor u ostavljenom roku, o čemu je obavezan dostaviti dokaz na osnovu koga će mu se utvrditi novi termin za potpisivanje ugovora.

(4) Stipendije su nepovratne pod uslovom da kandidat kao potpisnik ugovora redovno ispunjava svoje ugovorene obaveze.

Član 13. (Isplata stipendija)

(1) Isplata stipendije vrši se prijenosom sredstava na transakcijski račun korisnika iste, nakon zaključivanja ugovora iz člana 12. ovog pravilnika.

(2) Prije zaključivanja ugovora iz stava (1) ovog člana ministar donosi odluku kojom utvrđuje listu dobitnika stipendija, a koja pored općih podataka o dobitnicima stipendija (ime i prezime, naziv visokoškolske ustanove i fakulteta, godina studija) sadrži i sljedeće podatke:

- a) pojedinačan iznos stipendije,
- b) način uplate dodijeljenih stipendija,
- c) budžetsku poziciju sa koje se sredstva odobravaju, te
- d) eventualno druge relevantne podatke.

Član 14. (Gubitak prava na isplatu stipendije)

(1) Korisnik gubi pravo na isplatu stipendije, a isplaćenu stipendiju dužan je vratiti u cjelosti ili odgovarajućem iznosu, u zavisnosti od okolnosti koje su dovele do gubitka stipendije, što će se posebno regulisati odredbama ugovora, ukoliko nastupe sljedeće okolnosti:

- a) ako mu bude izrečena disciplinska mjera isključenja sa Univerziteta,
- b) ako mu po nekom osnovu prestane status redovnog studenta na Univerzitetu,
- c) ako se naknadno utvrdi da je prilikom prijave na konkurs iznio lažne činjenice ili upotrijebio lažne dokaze.

(2) Korisnik stipendije dužan je prijaviti svaku promjenu koja je od uticaja na korištenje dodijeljene stipendije, u roku od 15 dana od dana nastupanja iste.

Član 15. (Stupanje na snagu)

Ovaj pravilnik stupa na snagu danom donošenja, i bit će objavljen u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
Ministarstvo obrazovanja i nauke
Broj: 10/1-02-018917/22
Tuzla, 22.08.2022. godine

MINISTAR
dr.sci. Ahmed Omerović

1. Svojeručnim potpisom i ovom izjavom potvrđujem pod materijalnom i krivičnom odgovornošću da su gore navedeni podaci istiniti.

2. Svojeručnim potpisom potvrđujem i dajem pisanu saglasnost za korištenje mojih ličnih podataka kroz cjelokupan postupak po Konkursu za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona, prvog i integrisanog prvog i drugog ciklusa studija, u akademskoj 20___/20___. godini, u skladu sa Zakonom o zaštiti ličnih podataka BiH.

Mjesto: _____

Datum: _____

(potpis podnosioca prijave)

(naziv visokoškolske ustanove)

(adresa i sjedište visokoškolske ustanove)

Broj:

Datum:

Na osnovu _____ izdaje se sljedeće:

UVJERENJE

_____ upisan je u _____ godinu studija na _____
(ime, ime jednog roditelja i prezime studenta) (naziv fakulteta)
u statusu _____ studenta, i do upisa navedene godine studija položio je sve ispite iz
prethodnih godina studija.

Imenovani student je u toku redovnog studija ostvario sljedeći prosjek ocjena:

- prosjek ocjena u prethodnoj godini studija: _____
(sveden na dvije decimale)
- ukupan prosjek ocjena u svim prethodnim godinama studija: _____
(sveden na dvije decimale)

Potpis izdavaoca uvjerenja: